

伤寒绪论

發熱

發熱多屬表證。傷寒寒鬱肌表，則腠理閉密，故翕發熱，捫之烙手。當以脈之浮緊浮緩證之。無汗有汗，分風寒營衛施治。若汗不得出而煩躁者，營衛俱傷，陽邪內擾也。大青龍湯若尺中無力者，此為本虛小建中湯加減。○凡服表藥三劑，汗不出，熱不止者，死。然有陽微不能作汗者，可用再造散，或黃耆建中加附子。血虛加芎歸，始能作汗。此皆冬月發表藥也。若汗下後惡寒，脈弱大便不結者，屬虛，宜溫補助陽為主。○寒邪傳裏而變熱，則蒸蒸發熱。此即本身中元氣為寒所鬱，不得泄而化為火也。若裏證具而表證未已者，大柴胡湯。表證既罷而裏證已急者，三承氣湯選用。○三陰經寒證，太陰厥陰俱不發熱，惟少陰病有反發熱脈沉者，此非傳經，乃直中少陰，而仍兼太陽，故能發熱也。○春分以後，雖感寒邪，皆為非時暴寒，不必拘於傷寒例治。古人治感冒諸方，如芎蘇神朮等，皆不分三陽經藥，以時屬少陽風木，不獨太陽寒水也。○夏月汗府疎豁，偶感微寒發熱，必心包先受，消暑十全證也。○秋涼發熱，效噉宜金沸草散，甚則小青龍湯。若交霜降節後，即屬正傷寒矣。○其或冬時過暖而病發熱，心煩咽痛，或自利者，為冬溫陽旦湯證也。○凡春時發熱，頭疼煩渴飲水，為伏氣發溫。○春夏發熱而脈大無力，為夾內傷。○發熱而脈細小或虛足脛逆冷，而陽縮入腹者，為夾陰。○發熱脈沉小或短澀，而足冷陽縮，兼腹滿或痛，為食鬱。雖夏月不妨用薑桂，使溫煖之氣助其陽和，并食亦得消散。雖有表證，慎不可純用表劑，升其虛陽，亦不可過用消導，引邪內犯。○有食積發熱，則胸膈煩熱，熱則顛脹，復有瘀血發熱，則脇下或少腹痛，不可拊。又有陰虛發熱，必夜熱晨涼。若瘡瘍初起發熱，必有痛處，並不可誤施汗劑。○其脈陰陽俱虛，熱不止，大汗後身愈熱，下利煩躁不止，汗下後大熱，脈躁亂者，皆不可治也。

孫兆治一道士發熱汗出驚眩身戰掉欲擗地有欲發汗者有欲作中風治者有欲以涼藥解之者孫

曰。此太陽經欲解。腎氣虛不能作汗。所以心悸目眩身戰。與真武湯三服微汗而解。

頭痛

昔人以頭痛專主太陽。殊不知三陽經各有部分。如太陽頭痛自腦後上至巔頂。下有項強腰脊痛之異。以太陽經脈行身之後也。當辨中風傷寒汗之。○汗後頭痛如破。此轉屬陽明也。○風火相煽。頭痛如破。諸藥不效。愈表愈痛。痛連眉棱者。選奇湯證也。○陽明頭痛上連目珠。痛在額前。兼鼻孔乾。下有身熱不眠之分。以陽明經脈行身之前也。○少陽頭痛上至兩角。下有耳聾脇痛之殊。以少陽經脈行身之側也。○三時感冒。皆有頭痛。當從芍藥蘇葦選用。○三陰經至頸而還。惟厥陰之脈上巔與督脈會。故有頭痛上則巔頂。收引頭角。下有脈沉弦細。手足厥冷。此為在經。當歸四逆湯。若在裏。則乾嘔吐涎沫。頭痛。吳茱萸湯。○太陽中濕。則上有鼻塞吐痰。下有腹滿自利。○少陰中寒。上則入連腦齒。下則煩躁爪甲青。此真頭痛。不治。○陽明熱蒸。頭痛必小便黃赤。而短數。調胃承氣湯。○太陽脈沉身熱。頭痛為夾陰。黃耆建中湯。若誤汗不差者。四逆湯溫之。○太陽證下之。頭痛未除。脣寒面青。指頭微厥。復發熱者。為表邪內陷於陰分。雖頭痛發熱。不可用表藥。宜竹葉石膏湯。○冬溫發熱。頭痛心煩咽痛。自利。陽旦湯。○溫病熱病。時行疫癘。初起頭痛。皆不可用表藥。宜黃芩白虎加蔥豉。或葛根蔥白湯以治。外涼膈雙解。達原承氣。加蔥豉薑棗。合內外而治之。裏氣一通。頭痛自愈。○內傷火炎。新產血虛。皆有頭痛。但時痛時止。而無腦後痛者。蓋火炎則痛自兩角。血虛則痛連魚尾。以其自內達外。故必行少陽部分。是以頭痛見兩角者。則有少陽風熱與虛火之別。若見額前者。亦有陽明與食積之殊。其見腦後者。必太陽外感無疑也。

頭重

濁陰寒濕之邪。上干清陽之位。故使頭重。○頭重惡寒。項強不能舉者。屬太陽。汗之則愈。○若陰陽易頭重。眼中生花者。逍遙湯下。燒視散。○若眩暈而頭重不能舉者。此雖夾痰。亦屬氣虛。導痰六君選用。

頭脹

頭脹者。氣虛火炎也。冬溫風溫溫病熱病時行。中暍中暑。多有頭重脹痛。皆是濕熱火氣內燔。慎不可用發散藥。如冬溫陽旦湯。風溫葶藶湯。溫病黃芩湯。熱病時行中暍白虎湯。中暑清暑益氣湯。此皆傷寒家切務。其他濕熱疫飲食積疰夏等。俱有頭重脹痛。乃屬雜證。此不復贅。

項強

太陽之脈。從頭下項。連風府。故項強為太陽表證。然項強入八。如凍鳥縮頸。欲伸而不能自如者。此胃氣不得上升。乃邪將犯陽明之候。若汗出惡風者。桂枝加葛根湯。無汗惡風者。葛根湯。○項強連脇下滿身熱惡風。手足溫而渴者。為邪干少陽。小柴胡湯。乃知項強多兼陽明少陽。不可執認太陽也。○又結胸證項強如柔痙狀。此裏實證。以背為胸之府。背強項亦強也。急下之。○天行時氣發熱。至晚則腰脊痛。頭項強身重。輕則涼膈。重則雙解。並加葱白香豉。○寒濕項強發痙。及過汗經虛生風發痙。與陰毒項強治法詳總論中。

惡風

傷風惡風。見風則怯。密室之中。則不惡也。蓋風為陽邪。必傷衛氣。衛虛則腠理疎而自汗。汗去則脈浮緩也。是以桂枝湯專主自汗發熱惡風之證。然寒傷營。亦有惡風無汗而喘者。蓋惡寒則有陰陽之異。惡風悉屬於陽。故惡風未罷者。必當先解其外也。○若發汗太過。衛虛亡陽。遂漏不止。惡風。桂枝加附子湯。○風濕熱病寒疫內傷惡風。詳總論中。

惡寒

傷寒惡寒。雖身居密室。猶自憎寒。拘急甚。則寒慄鼓顙。向火不能遏其寒。非若寒熱之惡寒。熱至則不惡也。如已發熱。則身熱不欲去衣。由陰氣上入陽中。或陽微。或風虛相搏所致。惡寒一切屬表。雖裏證悉具。而微惡寒者。猶當解表。俟惡寒已。乃可攻裏。故先惡寒而發熱者。為外惡寒。為陽病在陽。宜發汗。然尺中遲弱者。慎不可汗。當用黃耆建中湯。○若太陽證犯本惡寒發熱未除。渴而小便不利者。五苓散先服一

半探吐之。發汗後惡寒為虛。芍藥甘草附子湯溫之。○若下利惡寒手足溫者。陽邪內陷於太陰之經也。小建中湯。○下證悉具而微惡寒及下利惡寒時時自煩者。為陽邪內伏。並宜大柴胡湯。○結胸證微惡寒者。必先用桂枝湯解表。然後用陷胸湯下之。若表不解而便攻之。表邪復結。其證必危。故結胸有一毫惡寒不可下也。○若初起惡寒。踰臥脈沉者。為內惡寒。為陰病在陰。則宜溫。雖夏月亦須蓋附。輕則理中。重則四逆。若當盛暑須參大順冷香漿水等治之。○少陰病惡寒身踰而利手足厥冷。煩躁脈不至及四逆惡寒不煩而躁。皆死證也。○經曰。發熱惡寒發於陽。無熱惡寒發於陰。尚何疑哉。○溫熱時行惡寒。詳總論本例中。

石頑治玉峯陸去非繼室嘉平患惡寒。周身骨節皆疼。飲食不入者已三日。而惡寒未止。全不發熱。診其六脈悉緊。而細詢之。平日起居飲食絕少。雖暑月不離複衣。知其素稟虛寒。而不能發熱。洵為太陽寒傷營證無疑。但從來極虛感寒。無正發汗之理。乃以黃耆建中製生附汁於者內。以助衛氣。一服肢體即溫。但背猶畏寒不止。更與補中益氣十全大補。並加熟附而安。

背惡寒

人身背為陽。背惡寒者。陽虛之驗也。然陽氣內陷亦有此證。是以背惡寒有陰陽之異。若風寒在表。則一身盡寒矣。但背惡寒者。陰寒氣盛可知。以陰氣不能消耗津液。故少陰病二三日。口中和。背惡寒者。宜附子湯。及灸氣海。○熱病初起。口燥心煩。而背微惡寒者。此陽氣內伏於陰中。肌表之陽不勝邪。及陽明中暍。俱有是證。以陽邪內消津液。故煩渴引飲。並宜白虎加人參湯。若誤認陽虛而用溫藥。必致斑爛不救也。故曰。口中渴。知其內有熱。口中和。知其內有寒。此理皎然矣。○勞役內傷。背惡寒者。必寒一陣。止一陣。為陽虛內熱。東垣升陽散火湯。○又濕痰證。亦背惡寒。必肢體重痛。導痰湯加減。○若寒熱屢作而背惡寒。脈來弦數。身有痛處者。為發癰疽之候。

寒熱

傷寒寒熱往來者邪正分爭也。表邪欲入而正氣拒格。陰陽相勝而作也。然寒熱往來與寒熱如瘧不同。如瘧則作止有時。往來則作止無時。有日二三發者。傷寒寒熱往來。雖專屬少陽經。亦有兼太陽陽明者。邪居表多。則多寒。邪居裏多。則多熱。然治法專用小柴胡湯。隨證加減。寒多增桂枝。熱多倍柴胡。加芍藥。寒多而脈虛。去苓加熟附。熱多而脈實。去參用大黃。○凡少陽證。必先與小柴胡湯。和之。服後不解。若其脈反浮者。當與柴胡桂枝湯。使其邪從表而散。若脈加數者。當與大柴胡湯。使其邪從裏而去也。○有元氣寡弱之人。素被痰鬱。略有動作。勞傷則憎寒發熱。有似傷寒。其脈弦數無力。腋下及臂或腿縫中有核腫痛者。謂之勞發。切勿汗下。宜補中益氣。加降火清痰藥。輕者周時微汗自解。

如瘧

如瘧者。作止有時。非若寒熱往來之無定也。病二三日。寒熱往來。有時而作。脈浮洪者。此太陽似瘧也。若熱多寒少。尺脈遲。為血少也。○若日晡時作。汗出而煩。脈實者。此陽明似瘧也。○陽明少陽合病。日晡寒熱如瘧者。大柴胡湯。○若六七日。發熱惡寒。舌不短。囊不縮。脈浮緩者。此厥陰似瘧也。為欲愈。小柴胡湯加桂枝。○大率往來寒熱。不離少陽。不拘日數多少。邪氣淺深。及婦人熱入血室。並宜小柴胡湯加減。○太陽病八九日。如瘧狀。一日二三度發。為欲愈。

潮熱

陽明旺於未申。故日晡潮熱。一日一發。如潮信然。傷寒邪入陽明胃府。為邪熱內結。故可用承氣攻裏。凡欲攻裏。須病人脈實有力。再當審臍下有鞭滿結痛處。及問平昔有無動氣。量輕重施治。○發於寅卯者。屬少陽。發於巳午者。屬太陽。皆不可下。俟表證已。方可攻之。○潮熱而嘔。胸脇滿。盜汗出者。不可下。柴胡桂枝湯。○潮熱而脇下汗出。為臍實。大柴胡湯。手足心汗出者。為胃實。大承氣湯。二處無汗。為結未實。尚宜小柴胡和解。俟結定攻之。

無汗

風暑濕三者十人皆衛氣受病惟寒則營血受傷腠理緻密津液內滲陽邪有餘故身熱無汗而喘也蓋邪氣在表熏蒸腠理則汗出令邪不外蒸必傳入裏急用麻黃湯汗之若惡風項強者葛根湯緣邪漸次入陽明經也○陽明病無汗小便不利慎嚏者必發黃若渴欲飲水小便不利無汗者為犯本俱宜五苓散有飲水內畜而無汗桂枝去桂加茯苓白朮湯○有脈遲無陽不能作汗者桂枝麻黃各半湯○若溫熱病無汗黃芩白虎三黃石膏選用熱病發狂有汗者生無汗者死○成無己言三陰為病不得有汗朱奉議亦云三陰與陰陽易皆無汗而仲景厥陰例中大汗出熱不去內拘急四肢疼下利厥逆而惡寒者四逆湯主之又陰毒則額上及手背冷汗不止為亡陽將脫之兆素問云陰氣有餘為多汗身寒由是言之則三陰不宜有汗非三陰皆無汗也

自汗

太陽中風不由發表而汗泄謂之自汗以風傷衛則表虛不能自固而汗故用桂枝湯散邪以實衛也然濕氣傷於脾暑氣傷於心皆令自汗惟冬月寒傷營則發熱無汗若始本無汗四五日後忽然自汗出此寒邪傳裏而變熱知邪已入府矣凡傷風則惡風自汗頭痛發熱若裏證自汗必煩躁惡熱不惡風寒迥乎不侔也○又太陽經邪犯本則汗出而渴小便難○陽明經證則頭目痛骨節骨疼而自汗○陽明府證則腹滿自汗當詳審治之○有汗後惡寒汗不止為表虛黃耆建中湯并用溫粉撲之○有汗多亡陽不止者桂枝附子湯小便少者加茯苓○若陰證自汗必身冷厥逆經云陰氣有餘則多汗身寒四逆湯甚則加人參○溫病誤服表藥大汗出煩渴不解脈洪大者白虎湯○若傷濕則身重自汗中暑則脈虛自汗中暍則煩渴自汗濕溫則妄言足冷自汗風溫則鼻衄自汗霍亂則吐利自汗內傷勞倦則氣口虛大身熱自汗柔痙則摘擗自汗治法各詳總論中○若發熱而利大汗出熱反盛狂言不食及汗出如油喘而不休汗出如珠著身不流柔汗發黃環口黧黑者皆不可治

石頑治郭君升子素孱弱有失血證五月間患時行疫癘壯熱昏憤煩渴引飲自汗如蒸其脈時洪大

時減小。或用發散和解之劑。躁熱轉劇。不得已。懇治於余。用人參白虎調胃承氣。隨其脈之浮沉。邪之出入。相間而施。凡兩汗三下。所下皆黃水。至第四次。用黃龍湯。始得結糞五六枚。周身大汗。熱除而痊。若礙其體虛。而怯於攻擊。則邪熱彌熾。元氣日燼。烏能保有今日乎。

盜汗

盜汗者。睡即濺濺然汗出。覺則止而不復出矣。蓋邪居於衛而欲入。睡即衛氣行於裏。乘表中陽氣不繼。津液得泄。故但睡而汗出。覺則氣散於表而汗止矣。故雜病盜汗。責於陰虛血熱。傷寒盜汗。責在牛表半裏。為膽有熱。故專用小柴胡湯。若脈浮緊。潮熱盜汗。柴胡桂枝湯。經云。微盜汗出。反惡寒者。表未解也。○又陽明病。當作裏實。而脈微弦者。必盜汗出。○又三陽合病。目合則汗。熱病白虎湯。傷寒小柴胡湯。○溫病熱病得汗後。大熱除而盜汗出。及時疫下後。盜汗不止。身有微熱。俱宜小柴胡去參半加橘皮。

頭汗

三陰之經。皆至頸胸中。獨三陽經。上循於頭。故頭汗出身無汗。劑頸而還。乃陰陽不和。邪居表裏之間。故有是證。當以小柴胡湯和之。然瘀血發黃水氣三證。亦有頭汗。當以證辨之。蓋瘀血頭汗。則小便自利。大便色黑。發黃頭汗。則小便不利。發熱而渴。水氣頭汗。則胸滿喘欬。若牛表半裏。則往來寒熱。亦有微惡寒。手足冷。脈沉者。○大抵頭汗雖主少陽。然屬陽明濕熱。不得發越者最多。至若額上汗出。而腦後無汗者。定屬陽明無疑。○頭汗多有裏實證。故頭汗而脇下滿。大便堅者。大柴胡湯。頭汗譫語者。調胃承氣湯。○若頭汗而心下懊懣者。為虛煩。梔子豉湯。○下血而譫語。頭上汗出。為熱入血室。小柴胡去參。加當歸。桃仁丹皮。○凡頭汗出。不得小便者。不治。經云。關格不通。不得尿。頭無汗者。可治。有汗者死。○濕家誤汗。額上汗出。而喘。小便難。大便利者。為陽脫。經云。濕家汗之。額上汗出。小便利者。死。下利不止者。亦死。以陰陽上下俱脫也。

孫兆治一人頭汗。手足冷。心下痞悶。大便秘。脈沉緊。或者見其四肢冷。又汗出煩悶。以為陰結。孫曰。大

便結非虛結也。安得為陰。按少陰多有自利者。今脈雖沉緊。不得為少陰證。此在半表半裏。投以小柴胡湯而愈。此一段正是仲景議論處。意謂四肢逆冷。脈沉緊。腹滿全似少陰。然大便鞭。頭汗出。不得為少陰。蓋頭者三陽同聚。若三陰經則至胸而還。今有頭汗出。是似陽虛。故曰汗出為陽微。若少陰額上冷汗。則為陰毒矣。

手足厥股汗

手足汗出者。為熱聚於胃。胃為津液之府。以熱蘊於內。故津液旁達也。凡傷寒日晡潮熱。手足澀澀汗出者。為胃實。若手足心腋下。澀澀然汗出者。為兼少陽實熱也。大柴胡三承氣選用。然亦有屬胃中寒者。經云。陽明病不能食。小便不利。手足澀澀然汗出者。此欲作固瘕。大便必初鞭後溏。此胃中虛冷。欲溏泄也。當知此汗必冷。宜用理中溫之。不可概以為胃熱也。

東垣治一人。脚膝痿弱。下尻臀皆冷。陰汗臊臭。精滑不固。脈沉數有力。為火鬱於內。逼陰於外也。精氣不固者。髓中混以濕熱也。以小柴胡去參。加茯苓。膽草。黃芩。苦寒瀉之而愈。

煩熱

煩熱為鬱悶不安。火熱不得發越之象。不經汗吐下而煩熱者。為太陽表證。經曰。病人煩熱。汗出則解。如未作膈實。當和解而已。若心下滿而煩。則有吐下之殊。煩熱自汗而渴。屬陽明煩熱。脈弦喜嘔。或煩而不嘔。屬少陽不可不辨。○汗下後六七日不大便。小腹滿而煩。或胸中痛而煩。熱喘逆者。為有燥屎。大承氣湯急下之。○若四五日鼻乾目瞑。脈數而煩者。為欲衄。黃芩湯加柴葛枳桔生地山梔清解之。○凡傷寒六七日。手足三部脈皆至。大煩而口噤不能言。其人躁擾者。為欲作汗解。○差後虛煩不得眠。竹葉石膏湯。○差後得食而煩。損穀則愈。○有內傷勞役。陰火動而時煩時靜。不可誤認外感而施汗下也。○凡服藥後煩悶不安。頭面髮際遍身發癢者。謂之藥煩。此胃虛不能勝藥力也。與熱薑湯徐徐呷之。藥中宜加用生薑。以行胃氣自安。

煩躁

煩熱悉屬三陽煩躁則有陰陽之異蓋心熱則煩腎熱則躁煩者心胸愠怒如有所觸外不形現為熱尚輕躁乃手足動掉若無所措內外不寧為熱最劇○有太陽表證發熱頭痛惡寒不汗出而煩躁者大青龍湯○有太陽裏證渴欲飲水而煩躁及無熱但狂言煩躁者並宜五苓散○有表證罷而不大便煩躁者此陽明府實三承氣選用○有汗下不解而煩躁惡寒者此為虛寒茯苓四逆湯○有脈數心煩而躁至夜不寧者為血虛芍藥甘草湯○有晝日煩躁至夜安靜者為陽虛乾薑附子湯○有誤用薑附而煩躁虛則升陽散火實則黃連解毒若躁極脈亂者勿治也○有少陰病吐利手足厥冷煩躁欲死者吳茱萸湯○有陰盛格陽脈沉細而疾渴欲飲水躁極悶亂者此水極似火也用霹靂散并以火熨之進熱藥而躁反甚此藥力未到不可遽用寒涼使陽氣益消則死宜再與熱藥協濟之○有溫病熱病時疫溫疫表裏俱邪三焦大熱煩躁大渴者白虎解毒涼膈雙解承氣三黃石膏選用○有少陰病六七日無大熱或厥逆自利不得汗脈沉數而煩躁者黃連阿膠湯○凡不經汗下而煩躁者為實汗下後煩躁為虛○結胸證悉具而煩躁發熱下利厥逆而躁不得眠少陰吐利煩躁四肢惡寒身蹇脈不至不煩而躁者皆死證也

節菴治一壯年夏間勞役後食冷物夜臥遺精遂發熱痞悶到晚頭額時痛兩足不溫醫不知頭痛為火熱上乘足冷為脾氣不下誤認外感夾陰而與五積汗之則煩躁口乾目赤便秘明日便與承氣下之但有黃水身強如瘕煩躁轉劇腹脹喘急舌胎黃黑已六七日矣診其脈六七至而弦勁急以黃龍湯下黑物甚多下後腹脹頓寬躁熱頓減但夜間仍熱舌胎未盡更與解毒湯合生脈散加地黃二劑熱除平調月餘而安 戊存橘治一大熱八九日已經汗下而熱不退煩躁目赤拘急沉重六脈洪盛曰此熱在三焦閉塞經絡津液營衛不通也以三黃石膏加辰砂末連進三服而愈 喻嘉言治一人傷寒六七日身熱目赤索水至前而不能飲異常大躁門牖洞啟身卧地上展轉不安更欲入井醫

欲以承氣與之。診其脈洪大無倫。重按無力。此陽欲外脫。外顯假熱。內有真寒。敢以純陰之藥。重劫其陽乎。觀其得水不欲嚥。情已大露。而反可嚥大黃芒硝乎。天地燠蒸。必有大雨。此證頃刻一身大汗。不可救矣。於是以大劑人參。薑附甘草煎成冷服。服後寒戰。牙齒有聲。陽微之狀始著。以重綿和頭復之。更與一劑。微汗熱退而安。

懊憹

傷寒表證誤下。正氣內虛。陽邪內陷。結於心胸之間。鬱悶不舒。輕則虛煩懊憹。重則痞滿結胸矣。邪在膈上。則宜吐。熱結胃府。即宜下。不可拘也。○發汗吐下後。虛煩不得眠。劇者必反覆頭倒。心中懊憹。與陽明病下之。其外有熱。手足溫而不結胸。心中懊憹。及舌上胎滑。飢不能食。頭汗出而懊憹。三者皆邪熱鬱於胸中。並宜梔子豉湯吐之。○下之後。心中懊憹而煩。為有燥屎。○下後短氣煩躁。膈中拒痛。心中懊憹者。為結胸。○陽明病身熱無汗。口燥渴。大小便不利。心中懊憹。此為濕熱。必發黃。○溫熱病懊憹。為熱毒蘊於膈上。涼膈解毒選用。口燥呻吟錯語。不得眠。五苓散合黃連解毒湯。

江應宿治傷寒十餘日。身熱無汗。怫鬱不得卧。非躁非煩。非寒非痛。時發一聲。如數息之狀。乃懊憹。怫鬱證也。投以梔子豉湯吐之。治其懊憹。再以大柴胡下之。治其怫鬱而安。

身體痛

傷寒身疼脈浮。則為太陽表證。以寒氣襲於經絡之間。故惡寒無汗。而骨節煩疼也。必用麻黃湯辛熱發表。令氣血流通而愈。若自汗脈浮緩者。則腠理開泄。雖發熱而身體骨節不疼矣。若傷寒身疼而見尺脈遲弱者。此為氣血本虛。不可驟表。當先用黃耆建中溫之。然後發表可也。○有汗後身疼。脈遲者。此陽氣虛也。新加湯。○有發汗吐下後身疼不休。表證不解者。仲景必與桂枝湯。以汗吐下後津液內耗。雖有表邪。止宜桂枝調和營衛。不可復用麻黃也。○有太陽表證具。而身疼頭痛。脈不浮而沉遲無力者。此真陽內虛。不能勝任麻黃。當與四逆湯溫之。○有裏證身疼者。乃直中裏證。非傳經裏證也。若傳經裏證。則屬

熱熱主血行。又何有身痛哉。然直中身疼者。寒氣直入於裏。陽已內衰。不能外通。而氣血凝滯。故令體痛。宜急溫之。凡有頭痛發熱。而身疼如縛者。表證也。無頭痛發熱。而身疼如杖者。直中也。○有少陰病。脈沉手足寒。身體痛。骨節疼。口中和。背惡寒者。附子湯。○有少陰下利清穀。而身疼痛。急當救裏。然後治表。○有陰毒。身痛如被杖者。有瘀血。一身盡痛。而發熱面黃者。有中濕。聲重鼻塞。一身盡重。而痛者。有風濕。一身盡痛。惡風不欲去衣。汗出小便難者。有內傷勞倦。脈虛倦怠。而肢體疼者。各詳總論本例中。

石頑治梁谿吳公益。患傷寒發熱。頭痛先曾服過發散之劑。而致面赤戴陽。四肢逆冷。周身骨節大痛。臍腰與小腹相引急痛。逆縮入腹。囊冷如冰。飲食不入。時時煩躁而渴。勢已瀕危。諸醫令具後事矣。余診之。脈雖洪大。鼓指而按之漸小。無力。曰。此真元內虧。陰火不歸。而遊散在上在外也。遂與四逆加參耆下黑錫丹。二劑上熱頓除。下體漸溫。惟周身痛楚不減。繼與大建中。人參養榮。調理而痊。

拘急

四肢為諸陽之本。寒邪客於經絡之中。故使拘急不和也。有因發汗亡陽。津血內竭。不能榮養筋脈。而屈伸不便者。有陽氣內衰。不能行於四末。而拘急疼痛者。大抵有發熱頭痛骨節疼。而四肢拘急。為表證。無身熱頭疼。而蹇卧不伸。四肢拘急者。為陰證。若汗下後。筋惕肉瞤。而見拘急不仁者。則為氣血虛弱也。○脈浮自汗出。小便數。心煩微惡寒。脚掣急。不可與桂枝湯。當與黃耆建中湯。○發汗後惡風。小便難。四肢拘急者。桂枝加附子湯。○吐利後汗出。發熱惡風。拘急厥逆。及直中陰經厥逆拘急。並宜四逆湯。

心下滿

心下滿者。謂正當心下。鞭滿乃病在氣分。邪將入裏而未入也。若下早。表邪入裏而滿者。則為痞也。○凡心下滿。以手按之。散而濡者。此虛氣也。若按之。汨汨有聲而軟者。有停飲也。若按之。鞭痛者。有宿食也。若按之痛。而其人善忘者。有畜血也。治法各具本條。○陽明證。心下鞭滿者。不可下。以邪在氣分也。下之利不止者。死。利止者愈。○又曰。脈浮而大。心下反鞭。有熱屬藏者。攻之。此燥屎逆上攻脾也。調胃承氣湯。○

胸脇滿痛

胸脇滿者。為胸脇下氣塞滿。悶非心下滿也。邪氣自表傳裏。必先胸膈。次傳脇下。而入胃府。是以胸滿多帶表證。脇滿當半裏也。○太陽陽明合病。喘而胸滿者。麻黃湯。則知胸滿屬表。而須發汗也。○又太陽病下後。脈促胸滿者。桂枝去芍藥湯。以病在衛氣。芍藥入營。故去之。○太陽病不解。傳入少陽。脇下鞭滿。嘔不能食。往來寒熱。脈雖沉緊。只宜小柴胡和解之。若舌上有白胎。雖不大便。不可下。本方去參加橘皮。○傷寒七八日。下之。胸滿驚煩。此邪氣乘虛而入。少陽之本也。柴胡加龍骨牡蠣湯。○大抵胸脇滿為邪初入裏。氣鬱不行之候。只宜柴胡枳桔和之。若邪氣留於胸中為實。則宜吐也。經曰。病在胸中。當吐之。○若發熱咳嗽。胸滿而兩脇痛如挫者。此邪熱挾濕痰攻注也。小柴胡去參半。加枳殼桔梗。梔子。杏仁。白芥子。竹瀝薑汁。○若心下滿。其人曾因挫大便黑。而脇下刺痛者。此有瘀血也。桃核承氣加枳桔柴胡。不應加生附子。○脇下偏痛發熱。其脈緊弦。此寒也。以溫藥下之。大黃附子湯。

痞

痞者。痞塞不通之謂。以下之太早。虛邪內入。而為痞。故胸中但滿而按之不痛也。有表證未解者。又當柴胡桂枝等解散。然後用瀉心等劑。○有汗解後。心下痞鞭。腹中雷鳴下利者。此胃中不和也。生薑瀉心湯。○有太陽病誤下而痞者。此胃虛客邪上逆也。甘草瀉心湯。○有少陽病誤下。心下但滿而不痛者。此痰濕上逆也。半夏瀉心湯。○有心下痞。按之濡。關上脈浮者。此熱邪上盛也。大黃黃連瀉心湯。○有心下痞而復惡寒者。此上有濕熱。下有陳寒。冷熱偏勝也。附子瀉心湯。○大下後復發汗。心下痞。惡寒者。表未解也。先用桂枝湯解表。後用大黃黃連瀉心湯攻痞。○本以下之。故心下痞。與瀉心湯痞不解。其人渴而躁煩。小便不利者。五苓散。○有心下痞滿。引脇下痛。乾嘔。短氣。汗出不惡寒者。此脇下有水氣也。十棗湯。○有外證未除而數下之。利不止。心下痞鞭。表裏不解者。此協熱利痞也。桂枝人參湯。○傷寒吐下不解。心下痞鞭。噫氣不除者。旋覆代赭石湯。○傷寒發熱汗出不解。心下痞悶嘔吐而下利者。大柴胡湯。○大抵

胸脇痞結。未經攻下而成者。此或痰或食。或氣凝滯而然。只須小柴胡加枳桔以開豁之。曾經下後。此為外邪陷入而為痞結。方可用陷胸瀉心等劑以疎導之。今醫不分當下未下。見有心下脹滿。便呼結胸。輒與攻下之藥。乃成真痞結也。

結胸

傷寒表證誤下。實邪內陷。則為結胸。故當胸鞭滿而痛也。○凡結胸證。心下鞭滿。短氣煩躁。喘滿。心中懊憹。或項強如柔痙狀。或胸中高起。或腹內拒痛。或舌上燥渴。或日晡小有潮熱。或從心下至小腹鞭滿。脈寸浮。關沉。為大結胸。大陷胸證也。凡用陷胸湯。宜加陳倉米一撮。以曾經誤下。胃先受傷。用以護持中氣。最妙。若氣弱脈沉遲。不可攻者。理中圓頻與之。甚則少加附子。○心下滿而按之方痛。脈浮滑者。為小結胸。小陷胸湯。○若心下結痛而無熱證。不渴不煩。此寒實結胸也。甘草乾薑湯。未効。枳實理中湯。如實人三鞭不可按。其人善忘。小便反利而不渴者。此血結也。桃仁承氣湯。○心下石鞭。胸前大熱而脹滿。結痛飽悶。氣急者。此食結也。或已下。或未下。並宜調中飲。虛者可用枳實理中。○胸中滿。結脈浮大者。不可下。下之則死。此邪猶在表也。先與桂枝湯解表。俟表證已然後攻之。○若未經下者。非結胸也。雖有胸脇痞滿。只宜小柴胡加枳桔。或加桂枝和解之。○誤下之初。覺結胸證。見急宜理中湯。服此湯便可解散。如未解。候日足再下之。○凡結胸有兼發黃發斑。發狂發呃。發噦者。最劇。結胸證具而煩躁者。死。結胸二三下之不退者。死。喘急直視。昏憤。厥逆。手足冷。或下出稀水。糞者。皆不可治。大抵結胸之脈沉緊滑實者。乃可攻之。若沉微細小者。決難救矣。

藏結

病如結胸狀。飲食如故。時時下利。寸脈浮。關上小細沉緊。而無陽證。不往來寒熱。其人反靜。舌白胎滑者。藏結也。盧子繇言。藏結舌上胎白滑。滑者純陰之極。不可攻也。蓋舌乃心之苗。紅亦是正色。胎白而滑。如

物入水中。色剝而白也。按藏結一證。昔人以仲景言。舌上白胎滑者難治。又謂不可攻。復云此名藏結死。遂至置而不議。殊不知仲景所謂舌白胎滑者。以其仍有熱邪內結。所以生胎。若無邪結。則胎不生矣。只因裏氣素虛。不能蒸熱。故無陽證發見。舌胎亦不得乾燥。以其本虛邪結。故為難治。非真不治也。謂不可攻者。以其飲食如故。知邪不在胃也。時時自利。其腸中亦無留結也。邪既不結於腸胃。攻之無益。徒伐元氣耳。至於素有痞積。又加邪結新舊兩邪相搏。不解故死。雖然。未可概為死證。而委之不救也。喻嘉言曾舉黃連湯。余嘗用連理湯治之。亦有能食自利腹脹急者。用備急丸。有腹痛引脇下不可按者。用附子瀉心湯。有素有痞積。痛引陰筋者。用四逆湯加荊桂等。往往獲效。貴在臨證活法耳。

腹滿

陽邪傳入太陰。則腹滿。凡人胃氣調和。則營氣從中焦上蒸於肺。脾氣不運。則營氣不能上蒸。或從鬱火而滯於左脇。或協痰濕而凝於右脇。或隨糟粕而滯於小腹。故脾氣衰憊之人。腹脇常鞭滿也。凡腹脹滿而漫腫虛大者。屬氣滯腫。鞭光亮者。為水結。少腹濡腫而痛。有青紫筋膜絆於腹皮者。為瘀積也。○腹滿不減。按之痛者。為實。承氣湯下之。○腹滿時減。按之不痛。為虛。理中湯溫之。○病人自言腹滿。他人按之不滿。此屬陰證。切不可攻。攻之必死。四逆湯溫之。○氣口脈微弦。法當腹滿。不滿必便難。兩脚疼痛。此為虛寒。從下上也。當溫之。金匱大建中湯。○陽明病發熱。腹滿微喘。口燥不大便。或譫語者。大柴胡湯。○少陰病咽乾。腹滿六七日不大便。或下利。純清水。為陽熱亢極。急下之。大承氣湯。○病腹滿發熱十餘日。脈浮數。飲食如故。此風熱內陷也。厚朴七物湯。○腹中寒。氣雷鳴切痛。胸脇逆滿。嘔吐附子粳米湯。○汗後腹滿當溫之。厚朴生薑半夏甘草人參湯。○吐後腹滿宜下之。調胃承氣湯。○下後腹滿宜吐之。梔子厚朴湯。○腹滿身重。面垢遺尿。白虎湯。○大抵陽熱為邪。則腹滿而咽乾。陰寒為邪。則腹滿而吐利。食不下。若曾經汗吐下後腹滿者。治各不同也。

腹痛

胸痛屬表邪內陷脇痛屬半表半裏證若腹痛則純屬於裏但有傳經直中之殊蓋陽邪傳裏與正氣相搏而痛其痛不常而滿腹攻攪此猶帶表邪當以小建中和之因誤下陽邪陷入太陰而痛虛則桂枝加芍藥實則桂枝加大黃○陰寒在內而痛者則痛從臍下注少腹絛絛無休止時欲作利也當以四逆輩溫之○有燥屎宿食而痛者則煩躁不大便腹滿鞭痛是也當以三承氣攻之○下之太過而痛者則時劇時輕却喜溫按當用理中金匱大建中溫補之○少陰病腹痛四逆或欬或悸或小便不利或泄利下重四逆散清解之○胃中寒熱不和腹中痛欲嘔吐者黃連湯和之○中脘痛者屬太陰當臍痛者屬少陰少腹痛者屬厥陰○經曰諸痛為實下之則痛隨利減此言陽邪傳裏而痛也又腹為陰寒邪入內必先腹痛下利此言陰寒內結而痛也○凡腹痛喜得溫按而痛無休息者為直中陰寒若時痛時止而喜按揉者為傳經壞證皆宜溫之痛不可近而鞭滿者為實結痛不可近而濡軟者為畜血皆當下之此陰陽虛實血氣之大端也

小腹痛

小腹痛滿皆為裏證與胸脇滿之屬氣不同太陽風傷衛不解渴而小便不利邪熱犯本五苓散太陽寒傷營失汗熱結膀胱如狂小便自利小腹急滿結痛桃核承氣湯○尺中遲弦少腹濡滿痛不可按小便反利亦有難滿者為畜血代抵當湯○太陰身黃脈沉小腹滿小便不利茵陳蒿湯○陽明府實小便短赤大便祕結小腹鞭滿大承氣湯○陰證初起自覺小腹滿腰腹痛手足厥冷者真武湯○若冷結膀胱關元而陽氣不化小便不通者不可誤認溺閉而與利水藥宜先灸本穴然後溫補若灸後手足不溫者不治○又有陰陽易病小腹痛引腰膝小便不利者逍遙湯下燒裊散○病人素有痞氣連在臍旁痛引入陰筋者名臧結難治四逆湯加吳茱萸肉桂

譫語

經曰邪氣盛則實精氣奪則虛故實則譫語虛則鄭聲傷寒胃中熱甚上乘於心心為熱胃則神識昏迷

妄有所見而言。輕者睡中呢喃。重者不睡亦語。○有譫語者。合目自言。日用常行之事。是熱未至於甚也。獨語者。如見鬼狀。若劇者。發則不識人。語言不休者。又其甚也。言亂者。謂妄言罵詈。不避親疎。神明已亂也。狂言者。大開目。與人言所未嘗見之事。此邪熱之最劇者。凡此見其熱之輕重也。○脈來沉實。或數盛有力。二便秘濇。燥渴。譫語狂妄。腹脹滿。潮熱自汗。或下利。純清水。或心腹鞭滿。或過經不解。皆當下。若下後熱不止。或喘滿。氣逆而上奔。或泄利。氣脫而下奪。皆逆也。○大抵熱入於胃。水涸燥結。必發譫語。皆為實。有被火劫取汗。而譫語者。有亡陽譫語者。此為虛也。○發汗多。亡陽譫語。身自和。不可下。柴胡桂枝湯和之。○火迫譫語者。津液內竭。火熱侵耗所致也。桂枝甘草龍骨牡蠣湯。○得病無熱。但狂言煩躁不安。精米不與人相當。此熱結在膀胱。五苓散水調探吐之。或加知母甘草。名桂苓飲。○得病無頭痛。不惡寒。但身熱發渴。小便利。大便黑。口出無倫語。此熱在心脾。當歸活血湯。○當汗失汗。譫語善忘。善飢。漱水身黃。腹滿如狂者。屬瘀血也。桃核承氣湯。○婦人熱入血室。夜則譫語。如見鬼狀。小柴胡加當歸丹皮。○三陽合病。譫語面垢。遺尿。白虎湯。○大熱乾嘔。呻吟錯語。不得眠。黃連解毒湯。○溫熱病及時疫。誤用表藥。熱傳三焦。譫語悶亂者。三黃石膏加大黃下之。○凡譫語。無實熱燥結。可攻者。皆不可治。下後譫妄。雖稍緩。仍不止。若未見溲糞者。為下未盡。更下之。○諸如此者。脈短則死。脈自和則愈。又身微熱。脈浮大者。生。逆冷直視。脈沉細者。死。

石頑治陳仲吾勞力感寒。其人年齒雖高。而形體豐盛。飲啖兼人。濕熱素盛。初冬患發熱。胸腹脹滿。甫四日。而舌胎焦黑。芒刺痰喘。聲嘶譫語。喃喃不休。手足動擲。不寧時發呃。一二聲。二便秘濇。脈洪滑搏。指右倍於左。此濕熱挾和鬱發。下證之最急者。遂疏大承氣入鉄漿竹瀝薑汁與之。諸醫咸謂日數未久。不可使下。殊不知濕熱上逆。勢若洪水泛濫。稍遲則脹透膈膜。神丹莫濟矣。彼至厥中有善醫者。深以余言為然。急令煎服。連下粘垢二次。熱與譫語稍止。更服小陷胸至四五劑。神識始清。糜粥倍進。半月後。煩索醇酒。冰噉新橘。致疫濕復聚。仍痞悶譫妄發熱。或欲再進前方。取決於余。診之。則人迎小弱。